

INUIT ATAQATIGIIT INATSISARTUNI



UPA2022/157

22. marts 2022

Eqaluk Høegh

Uunga siunnersuut: Isumaginninnermik suliaasaqarfimmi pissaanermik atuineq pillugu Inatsisartut inatsisaat.

(Meeqqanut, Inuusuttunut Ilaqtariinnullu Naalakkersuisoq)

Isumaginninnermik suliaasaqarfimmi pissaanermik atuineq pillugu inatsip allanngortinnissaanut – naalakkersuisut siunnersuutaannut – Inuit Ataqatigiit sinnerlugit oqaaseqaatissarput maanna saqqummiutissavara.

Pissaanermik atuineq pillugu inatsisip 2013-mi akuersissutigineqarmat – tunngaviit taamani ilaatigut najoqqutarineqarsimasut ullumikkut nutarterneqarlutik allanngortinneqarsimapput. Taamaattumillu inatsisip atuuffiisa nutarterneqarnissaa pisariaqalersimammat Inuit Ataqatigiinniit tamanna paasilluarsinnaavarput.

Siunnersuutip meeqqanut tigummigallagaanermi atugassarititaasut pillugit pitsanngorsaaniarluni siunertaqarpoq. Kiisalu inersimasunut ulloq unnuarlu paaqqinnittarfinni immikkoortuni isumannaallisakkani inissinneqarsimasunut atatillugu malittarisassanik erseqqissunik immikkut malitseqartitsiniarluni aamma siunertaqarpoq. Taamaasilluni innuttaasut sulisullu inatsisitigut isumannaannerusumik inissisimalernissaat qulakkeerneqassaaq. Sulianut pissaanermik atuinermik tunngassuteqartunut akuersissuteqarsinnaanermut piginnaatitaanermut aamma allannguiniartoqarpoq.

Inatsisitigulli erseqqissumik maleruagassaqaarluni najoqqutassaqaarneq namminermi naammaneq ajortoq tamatta ilisimaaraarput. Periutsit malitassallu piviusunngortivinneqarnissaat angujumallugu naalakkersuisut pineqartumi qanimut sullissisuusut pikkorissarneqarnissaat kiisalu

INUIT ATAQATIGIIT INATSISARTUNI



sukumiinerusunik ilitsersuutunik nassuiaanertalinnik imaqartunik
pilersitsinissartik suliniutiginiarlugu neriorsuutigaat.

Inuit Ataqtigiinniit Naalakkersuisut suliamut taassumunnga atatillugu
ataatsimiitsiliaq susassaartoq killiffimmik ilisimatitsisarnissaat
kissaatigissavarput.

Siunnersuutip tusarniaassutigineqarneranut atatillugu akissuteqaatit
pillugit aammattaaq maluniagaqarpugut. Ilaatigut atuarneqarsinnaavoq
siunnersuutip imarisamigut danskit inatsisaannut assingulluinnartumik
sanarfisaasimaneranut tunngasoq. Tassa ernumaatigineqarpoq inatsimmi
siunnersuut takisuupilussuaq taaguutillu imarisaat eqqarsaatigalugit
paasilertoruminaatsupilussuarnik imaqarsinnaammata, taamaattumillu
kommunit inatsit malillugu ingerlatsinissaat eqqarsaatigalugu tamanna
ilungersunarsinnaanera ernumaatigineqarluni. Assersuutitut
taassumunnga oqariartuutigineqarpoq savalimmiuni assinganik
inatsisiliornerit ikinnerungaartunik paragraffilersorneqarlutik
inissisimmammata. Naalakkersuisut tamanna qanormita isumaqarfigivaat?
Naalakkersuisut taassumunnga tunngatillugu toqqaannartumik
akisussuteqarsimangimmata Inuit Ataqtigiinniit taamak
aperisariaqalersimavugut.

Taama oqaaseqarluta siunnersuut ataatsimiitsitaliamut susassaartumut
peqqissaarullugu suliassanngortinneqarnissaanut ingerlateqqinneqarnissaa
kissaatigalugu ataatsimiitsitaliaq susassaartoq sulilluarnissaanik
kissaapparput.